



**REPÚBLIKA DEMOKRÁTICA TIMÓR-LESTE**

**MENSAJEN SUA EXELÊNSIA PRIMEIRU-MINISTRU  
KAY RALA XANANA GUSMÃO  
IHA OKAZIAUN 60º ANIVERSÁRIU REPÚBLIKA  
POPULÁR XINA**

**Embaixada foun Xina nian iha Dili,  
29 Setembru 2009**

Sua Exelênsia Sr. Embaixador Fu Yuancong,

Exma. Senhora Yuancong,

Ilustres konvidadus,

Maluk sira no maun-alin Xina sira hotu,

Ho onra boot no laran kosolok tebes maka ha'u hakarak hato'o liafuan badak iha okaziaun solene ida ne'e, ne'ebé ita hamutuk selebra aniversáriu Fundasaun Xina Foun ba dala nenulu.

Transformasoens ne'ebé hala'o iha Xina, iha tinan hirak ne'e laran, extraordináriu tebes, tanba ne'e mak imposível atu ita la konsidera papél boot tebes ne'ebé Xina representa ba rejiaun aziátika no ba mundu tomak.

Ba ita timór-oan tomak, nu'udár Nasaun ki'ik no nurak ida, ho ema milhaun ka tokon ida de'it, ho admirasaun boot tebes mak ita hateke ba Nasaun kolosál ka jigantesku Xina, ho populasau ne'ebé barak liuhotu iha planeta ida ne'e, hodi observa mudansas no progresus ne'ebé sira halo ona, hanesan kona-ba oinsá ita nia belun boot País jigantesku ida ne'e, bele hamenus maka'as moris kiak, hasa'e taixa alfabetizasaun no halo buat seluktán.

Dalan naruk ne'ebé Repúblika Populár Xina la'o liu ona bele sai hanesan referênsia ba Timór-Leste no ba mundu tomak. Kresimentu ekonómiku Xina nian, maski ho krize finanseira atuál, investimentus iha nível mundiál no polítika dezvoltimentu i kooperasaun ho paízes ne'ebé kiak liu, sai hanesan kontribuisaun di'ak tebes ba humanidade tomak.

Timór-Leste hetan benefisius barak tanba kooperasaun di'ak ne'ebé halo ho Xina, no mós ho Paízes sira seluk. Kontributus ne'ebé halo liuhusi polítika promosaun Páz i dezvoltimentu no kontinua hala'o nafatin nia polítika diplomátika pasífika, halo be Xina sai hanesan Paíz ida ho esperansa boot tebes i, aban-bainrua bele sai nu'udár ekonomia ida ke boot liuhotu iha mundu, iha inísiu sékulu ida ne'e.

Tenke konsidera prosperidade Xina, liu-liu ba ekonomias ne'ebé foin sa'e buras iha rejiaun ida ne'e, tanba nia empenhu iha dezvoltimentu bele sai hanesan foku aprendizajen ba ita hotu. Xina hatene projeta estabilidade País, no halo esforsus maka'as atu promove kresimentu armoniozu, maibé la hamenus nia atuaun iha nível internasionál.

Investimentu diretu Xina nian ne'ebé aposta tiha ona iha África, iha projetus infra-estruturas no setores relevantes seluktán, bele haré iha Etiópia, Sudaun, Nijéria, Gana, Tanzânia, Zâmbia, Repúblika Demokrátika Kongu, Uganda, Repúblika Sentrál África no Angola – ne'e

foin temi nasaun balu husi lista ne'ebé naruk tebes – ne'ebé reflète nia kompromisu atu promove páz, kooperasaun no dezvoltimentu iha paízes pós-konflitu.

Investimentus públikus ka privadus iha setores produtivus, hamutuk ho transferênsia kompetênsias, assistênsia médika no manutensaun ba páz, loke tan oportunidadesno hadi'a kondisoens moris ba populasoens iha África.

Xina liuhusi parserias ne'ebé halo ho Nasoens barak, bele lori ai-hán ba ema barak ne'ebé hamlaha, edukasaun ba labarik sira, saúde ba ema ne'ebé moras no infra-estruturas hodi suporta dezvoltimentu iha setór privadu, aleinde hasa'e kreximentu ekonómiku iha paízes barak.

Senhoras ho Senhores,

Iha Timór-Leste mós Xina halo buat barak. Hahú husi lasus amizade ne'ebé ita hametin liután, i, iha ne'e, presiza fó hanoin katak Repúblika Populár Xina mak hanesan País ne'ebé uluk liuhotu tau nia Embaixada iha Dili, hafoin fó ajuda finanseira, institusionál, téknika no formasaun, to'o ba konstrusaun infra-estruturas no dezvoltimentu ba ita nia agrikultura, halo be ita mós hakarak kontinua aprende la'o hamutuk ho Xina, hodi buka halo tan parserias estratéjikas foun.

Ha'u agradece ba Governu Repúblika Populár Xina tanba fó nafatin apoiu no ha'u laran kontente ho abertura Embaixada foun Xina nian iha Dili, ne'ebé simboliza konsolidasaun relasoens amizade no kooperasaun entre paízes rua ne'e.

Tanba serve hanesan referênsia ba paízes ne'ebé kiak no ki'ik hanesan Timór-Leste, kativa ka atraí ita nia interese no konkista ita nia admirasaun – Xina sai hanesan símbolu esperansas ba paízes ne'ebé iha konstrusaun laran.

Ami hakarak tebes hametin liután lasus amizade no kooperasaun entre povu rua ne'e, tanba ne'e maka iha loron 16,17 no 18, fulan Outubru mai, ha'u sei bá Sichuan, atu partisipa iha *Western China International Economy and Trade Fair*, i sei aproveita oportunidade atu halo reuniaun trabalho ho Primeiru-Ministru Wen Jiabao.

Senhoras ho Senhores,

Iha okaziaun komemorasoens iha Xina, ha'u sei la husik liu oportunidade atu salienta vizaun no lideransa Sua Exelênsia Prezidente Hu Jintao. Governu Timór-Leste partilha vizaun diplomátika ne'ebé hanesan, katak povus hotu iha mundu tenke hetan oportunidades

dezenvolvimentu ne'ebé hanesan i, hamutuk, mak ita bele hasoru kualkér dezafius, hodi promove páz no dezenvolvimentu umanidade tomak nian.

Ha'u remata, hodi hato'o ho laran tomak ha'u nia kongratulosoens ba Povu Xinêz, ne'ebé moris iha Timór-Leste, iha Xina no iha mundu tomak, ba tinan nenulu Fundasaun Repúblika Populár Xina.

***Gong-xi nin, wo quin-ai de Zhong-guo peng-you men!***

(Kongratulosoens ba ha'u nia belun Xina sira hotu)

Obrigadu barak.

Kay Rala Xanana Gusmão

29 Setembru 2009